

鎮海沈郎橋葉氏宗譜

王禹襄
署端

重修葉氏宗譜序

自海內教育家摺拾澄衷先生軼事編入教本用課學
子繇是通國之人無不知有先生無不知先生爲鎮海
沈郎橋葉氏人沈郎橋葉氏之族望遂大著其有族譜
則始於遜清光緒辛卯至丁未而修輯一次迄民國十
有六年丁卯垂二十餘稔矣其宗老嶽青君大懼年久
不修文獻放失迺訪余於中興學校之蟬影居以重修
之筆政見屬余冗於校務疎於姓氏學以不克負荷爲
言嗣因老友趙君友笙之慫恿且館斯地久誼亦不容
固辭迺勉膺斯責焉溯葉氏先世系統据舊譜董序所

載有云出自慈谿者有云出自永嘉者按其宗支俱無
可接陳序亦云親蒞慈谿石步稽覈其譜中遷徙錄雖
有名與其始祖茂春公偶合而遷地及世次固未相符
蓋大率邁明季亂茂春公昆季流離轉徙卜居於此創
闢田廬以保餘生其於系統攸關固無暇詳述逮慶衍
後裔遂蔚爲華宗本春秋疑以傳疑信以傳信之旨斷
以爲始遷祖洵不易之定例也及展閱舊譜之世系圖
前後有二前圖仿蘇譜九世一提虛擬肇一公爲第一
世而茂春茂二二公隸其下後圖仿歐譜五世一提而
以茂春茂二二公爲第一世旁注肇一公長子次子字

樣傳卽附其後兩圖歧異莫衷一是由是宗祠書寫木
主從蘇從歐未能畫一昭穆行次將自此紊此次修譜
世系圖專仿歐譜以茂春茂二二公爲第一世祖另編
世次錄以記生卒配葬子女清眉目而便檢閱至於卷
次書法亦間有改易惟遵譜家舊例初非別有更張也
是役也始事於丁卯夏季迄己巳夏而竣工費時二稔
成譜都十四卷惟葉氏子姓挈眷旅外者夥安土家居
者少採訪有所未及傳寫或有舛訛秉筆者自無從著
錄質正之此又覽譜者當曲原也夫

民國十八年己巳夏五月同縣金賢松林墅甫撰

鎮海東管鄉沈郎橋葉氏宗譜總目

卷首

原序

凡例

葉村圖

宗祠圖

義莊圖

西東祖堂圖

樹德堂圖

先世墓圖

像圖

附贊

卷一

宗祠碑記

義莊記

支派異居考

先賢事實

宋科名錄

宗規

國厯正旦表

命名行次

卷二

系次總圖錄

卷三

系次分圖錄

西元房派

卷四

系次分圖錄

西亨房派

卷五

系次分圖錄

西利房派

卷六

系次分圖錄

西貞房派

卷七

系次分圖錄

東房派

卷八

系次分圖錄

西利房遷桃花派

卷九

系次分圖錄

西利房遷金塘派

卷十

系次分圖錄

東二房遷象山派

卷十一

系次分圖錄

遷鄞東周湖塘懸派

卷十二

誥敕

行狀

家傳

墓誌

贈言

卷終

雜誌

鎮海東管鄉沈郎橋葉氏宗譜卷首

原序

鎮海葉觀察成忠創作宗譜謁吾明而來言曰吾葉氏
在明季自慈谿遷今地而慈谿之宗支無可攷也相傳
謂出於永嘉葉水心先生之後而永嘉之宗支亦無可
考也傳緒至今已及十世有知其前數世而後無可稽
者有知其後數世而前無可溯者有前後尙可知而中
佚其數世者今將存其所可知而姑闕其所不知以成
吾譜其可乎余曰可哉譜之法原出於史史之法源出
於春秋信以傳信疑以傳疑春秋之大旨也夏五郭公

明知之而不敢增所謂史之闕文也史法莫著於司馬
遷而遷之自序中缺數世無得而詳焉譜法莫著於歐
蘇而歐譜自琮以下亡其七族蘇譜自高祖以上名次
皆佚亦無得而詳焉其闕也其慎也造作名字尊爲祖
宗非孝子慈孫之所敢安也成周之世以小史奠世系
定昭穆而譜牒皆掌於官魏晉以降尙有圖譜局凡百
官族姓有家狀官爲考定藏之秘閣副在左戶當時若
賈弼王儉徐勉王僧孺之屬並有專書疑若無缺者然
如荀氏家傳亦復中闕而無所承則以天下之族之繁
未必能搜采無遺也今之譜牒已當譜學淪亡之時更

何能一一無缺哉觀察之爲譜亦綦難矣詢故老稽栗
主搜墓碑核祀簿其勤也如彼而其慎也復如此則此
一譜也雖尙有文獻不足之憂而孝子慈孫所以報本
而追遠者洵可謂盡心焉爾若夫攀附華族以爲光寵
如正倫之於城南如義府之於趙郡如紹威之於昭諫
如崇韜之於汾陽則皆庸妄子之所爲吾更不必爲觀
察慮也旨在

光緒十七年歲次辛卯六月 吉旦

賜進士出身知州銜江西建昌縣知縣同郡董 沛孟

如甫序



原序

昔蕭相國收圖籍於關中韓昌黎考圖經於韶郡誠以
生民之盈歉政治之興衰攸關匪細故自古名卿碩彥
當務先急皆以是爲兢兢家之譜牒猶國之圖籍圖經
也前之將爲鼻祖記所流傳後之將爲耳孫溯其自出
辨系屬分昭穆開基者誰守成者誰任綦重矣而況茫
茫十餘傳無所依據而創作之夫豈易焉者哉吾鄉沈
郎橋葉氏聚族僅數十家向無宗祠宗譜已三百年於
茲矣族之崛起者曰成忠觀察君以寒微起家爲申江
巨商慨然有尊祖敬宗之念歲戊子爰命其弟司馬成

孝君創建宗祠規模宏敞。免輪並美。越一年纂作宗譜。遂延余總其事。而司馬則躬親采訪。不辭勞瘁。搜羅遺蹟。檢閱殘編。得其族叔祖本善公手編字畫模糊記錄。尙詳竭力追摹。可取者取之。不可取者棄之。而且近至石步鶴臯。追祖宗所自出。遠厯申江定海間遷徙所由。來有聞必錄。無主不求。雖中間不無闕佚。而世數已秩然。其可觀。司馬於是告余曰。我族父老相傳謂茂春公兄弟由慈西石步村遷居。今地分爲東西兩房。而茂春公實我西房之祖。若東房之祖。其諱蓋闕如也。於是追茂春公所自出之祖。而擬其行曰肇一。公茲姑以肇一。